

III. OUTRAS DISPOSICIÓNS

CONSELLERÍA DE FACENDA

Corrección de erros.-Orde do 14 de xaneiro de 2010 pola que se ditan instrucións sobre a confección de nóminas do persoal ao servizo da Administración autonómica para o ano 2010.

Advertidos erros na citada orde, publicada no DOG nº 12, do 20 de xaneiro de 2010, deben facerse as seguintes correccións:

Na páxina 694, onde figura: «A redución do 3% nas retribucións afecta tamén aqueles postos que en 2009 tivesen establecidas unhas contías iguais ou superiores ás vixentes nese ano para os postos con rango de dirección xeral», debe figurar: «Naqueles postos que en 2009 tivesen establecidas unhas contías iguais ou superiores ás vixentes nese ano para os postos con rango de dirección xeral, manteranse as mesmas que no ano 2009».

Na páxina 706, elimínase a categoría N-A-13 Profesor Logofonía e Logopedia, e os datos relativos a devandita categoría.

Na páxina 707, na categoría de persoal sanitario S-A2-09 A.T.S. Servizo Especial Urxencias, na cantidade do complemento específico, onde figura: «264,48», debe figurar: «274,85».

Na páxina 708, na categoría de persoal sanitario S-A2-99, onde figura: «Persoal de Logofonía e Logopedia», debe figurar: «Logopedia».

Na páxina 711, elimínase a categoría N-A-13 Profesor Logofonía e Logopedia, e os datos relativos a devandita categoría.

Na páxina 713, na categoría de persoal sanitario S-A2-99, onde figura: «Persoal de Logofonía e Logopedia», debe figurar: «Logopedia».

CONSELLERÍA DE MEDIO AMBIENTE, TERRITORIO E INFRAESTRUTURAS

Resolución do 11 de xaneiro de 2010 sobre a aprobación definitiva do expediente de delimitación do solo do núcleo rural da Veiga, na parroquia de Cerceda, concello do Corgo (Lugo).

I. Antecedentes.

O Concello do Corgo remite o referido proxecto de delimitación, para os efectos de obter a súa aprobación definitiva, conforme a disposición adicional 2ª.2 da Lei 9/2002, de ordenación urbanística e protección do medio rural de Galicia.

O proxecto está integrado por memoria, planos e anexos complementarios (superficies ocupadas e edificadas, nomenclátor e anexo fotográfico) redac-

tados en abril/maio de 2009 polo técnico municipal Antonio Manuel Seijas Pardo.

O concello do Corgo carece de instrumento de planeamento xeral, rexéndose polas normas de aplicación directa da LOUG e, no que non se opón a estas, polas normas complementarias e subsidiarias de planeamento provincial (en diante NNPP).

Atópase en tramitación un PXOM que foi aprobado inicialmente o 8 de marzo de 2005.

O 27 de xaneiro de 2009 a Dirección Xeral de Desenvolvemento Sostible da Xunta de Galicia adoptou resolución sobre a obrigatoriedade de sometemento do PXOM do Corgo a avaliación ambiental estratéxica (DOG nº 40, do 26 de febreiro).

Respecto da tramitación administrativa, cabe sinalar:

1. Consta decreto da Alcaldía do 3 de xuño de 2009, relativo á aprobación inicial da delimitación do núcleo da Veiga, tramitado por instancia do propio concello.

2. Cumpriuse co trámite de información pública mediante a publicación de anuncios no DOG nº 138, do 16 de xullo de 2009 e nos xornais *El Progreso* e *La Voz de Galicia* dos días 7 e 17 de xuño de 2009; constando certificación do secretario municipal do 21 de setembro, acreditativa da non presentación de alegación ningunha.

3. Consta acordo de aprobación provisional da delimitación do núcleo da Veiga adoptado polo Concello Pleno na súa sesión de 25 de setembro de 2009.

II. Consideracións e fundamentación.

Logo de analizar a documentación presentada polo Concello do Corgo, e á vista da proposta elevada pola Subdirección Xeral de Urbanismo, cómpre indicar:

1. A Veiga aparece recoñecido no nomenclátor de entidades de poboación da provincia de Lugo (Decreto autonómico 6/2000), así como no nomenclátor de entidades de poboación do Instituto Nacional de Estatística.

2. Delimítase un núcleo con 8 vivendas e unha superficie bruta de 21.160,57 m². A superficie neta, resultado de descontar da anterior a ocupada por vías públicas, é de 18.792,40 m². Así mesmo, defínese unha área de expansión de 2.646,23 m² de superficie neta.

3. De acordo co punto 8 do proxecto, as edificacións incluídas no ámbito do núcleo tradicional delimitado acadan unha superficie construída total de 3.796,29 m², a cal é superior á metade da que se podería edificar dentro del consonte as condicións urbanísticas aplicables, alcanzando o grao de consolidación mínima establecida no artigo 13.3.1º inciso, da LOUG.

A área de expansión delimitada xustifícase pola súa situación inmediata a dúas áreas do núcleo rural tradicional e a ausencia de terreos que exixan unha especial protección de acordo co artigo 32.2º da LOUG.